

**Sumáriu Kazu
Tribunál Judisiál Primeira Instánsia Baukau
Outubru 2024**

Afirmasaun: Sumáriu Kazu tuir mai ne'e deskreve faktu sira no prosesu iha Tribunál tuir JSMP nia monitorizasaun independente, no deklarasaun ne'ebé parte sira fó iha Tribunál nia laran. Informasaun ne'e la representa JSMP nia hanoin hanesan instituisaun ida.

JSMP kondena maka'as forma violénsia hotu-hotu, liuliu hasoru fetu no ema vulneravel. JSMP afirma la iha justifikasaun ba kualkér violénsia hasoru fetu.

A. Sumáriu prosesu julgamentu kazu iha Tribunál Judisiál Primeira Instánsia Baukau

1. Totál kazu ne'ebé JSMP monitoriza: 24

Artigu	Tipu Kazu	Númeru
Artigu 145 Kódigu Penál (KP) & artigu 2, 3, no 35 letra (b), 36 Lei Kontra Violénsia Doméstika (LKVD)	Ofensa ba integridade física simples ho natureza violénsia doméstika no tipu ilísitu sira kona-ba violénsia doméstika	19
artigu 2(nú.1(b), nú. 2(f)) no artigu 20(nú.1) hosi Lei Nú. 5/2017	Arma brankas	1
Artigu 258 Kódigu Penál (KP)	Danu simples	1
Artigu 258 (KP) no artigu 157 (KP)	Danu simples no ameasa	1
Artigu 140 (KP)	Omisídiu negligente	2
Totál		24

2. Totál desizaun ne'ebé JSMP monitoriza: 16

Tipu desizaun	Artigu	Númeru
Suspensaun ba prizaun nia ezekusaun	68 KP	7
Pena multa	67 KP	7
Pena multa no pena admoestasaun	67 KP no Artigu 82 KP	1
Pena admoestasaun	82 KP	1
Totál		16

3. Totál kazu ne'ebé sei kontinua prosesu tuir JSMP nia monitorizasaun hamutuk : 8

B. Deskrisaun sumáriu julgamentu ba desizaun kazu sira

1. Krime arma brankas

Nú. Prosesu : 0007/23. BCSIC
Kompozisaun Tribunál : Koletivu
Juis : Dr. Samuel da Costa Pacheo no Dra. Albertina da C. das Neves, Dra. Maria Solana da C. Fernandes
Prokuradór : Dr. Ambrósio Rangel Freitas
Defeza : Dr. Sidónio Maria Sarmento
Desizaun : Pena prizaun tinan 3 suspende ba tinan 3

Iha 07 Outubru 2024, Tribunál Judisiál Primeira Instáncia Baukau prezide leitura sentensa ba krime arma brankas ne'ebé envolve arguidu Agostu Freitas Marques hasoru Estadu RDTL, iha Aldeia Ledatame, Suku Wailili, Postu Administrativu Baukau Vila, Munisípiu Baukau.

Akuzasaun Prokuradór

Prokuradór akuza katak iha 03 Janeiru 2023, iha oras tuku 21:00 kalan, arguidu ho kondisaun lanu kaer ho katana taa ameasa nia feen inklui taa estraga kadeira masa rua no meza belador ida.

Prokuradór akuza arguidu kontra artigu 2(nú.1(b), nú. 2(f)) no artigu 20(nú.1) hosi Lei Nú. 5/2017 kona-ba Arte Marsiais, Rituais, Armas Brankas, Rama Ambon no Kinta Alterasaun Kódigu Penál.

Produsaun ba prova sira

Iha prosesu julgamentu, arguidu deklara katak faktu iha akuzasaun ne'e loos hotu, arrepende ninia hahalok no deklara sei la uza katana ameasa kualker ema iha futuru.

Prokuradór husu ba tribunál atu presinde testemuña tanba arguidu konfesa faktu, defeza la iha opozisaun nune'e tribunál hasai despaxu hodi presinde testemuña.

Alegasaun finál

Prokuradór haktuir katak faktu akuzasaun provadu hotu bazeia ba arguidu nia deklarasaun ne'ebé konfirma akuzasaun, tanba ne'e husu ba ba tribunál atu kondena arguidu ho pena prizaun tinan tolu suspende ba tinan tolu.

Entretantu, defeza haktuir katak arguidu konfesa, arrepende ninia hahalok, kolabora ho tribunál hodi la difikulta tribunál atu deskobre verdade, tanba ne'e husu ba tribunál atu fó pena ne'ebé kmaan ba arguidu.

Desizaun

Depoisde avalia faktu hotu, tribunál prova katak arguidu uza katana no transforma katana nia funsaun ba fali krime.

Bazeia ba faktu provadu sira ne'e no tetu mós ho sirkunstansia atenuante sira hanesan arguidu konfesa faktu sira, arrepende ninia hahalok no foin primeiravés mai hatan iha tribunál, nune'e tribunál konkluui prosesu ne'e no kondena arguidu ho pena prizaun tinan tolu suspende ba tinan tolu.

2. Krime ofensa ba integridade física simples ho natureza violéncia doméstika

Nú. Prosesu : 0010/23. BCLLB
Kompozisaun Tribunál : Singulár
Juis : Dra. Maria Solana da Conceição Freitas
Prokuradór : Dr. Ambrósio Rangel Freitas
Defeza : Dr. Germano Guterres Ramos
Desizaun : Pena multa US\$45.00

Iha 09 Outubru 2024, Tribunál Judisiál Primeira Instáncia Baukau prezide leitura sentensa ba krime ofensa ba integridade física simples ho natureza VD ne'ebé envolve arguidu MdCP hasoru nia feen, iha Munisípiu Baukau.

Akuzaun Prokuradór

Prokuradór akuza katak iha 18 Novembru 2023, iha oras tuku 07:00 dadeer, arguidu tebe ofendida nia kelen parte loos rezulta moras. Antes ne'e arguidu ho ofendida diskute malu kona-ba atu ba kuru bee, nune'e mosu agresaun ne'e.

Prokuradór akuza arguidu kontra artigu 145 KP kona-ba ofensa ba integridade física simples ho nia moldura penál to'o tinan 3 ka multa no konjuga ho artigu 2, 3, 35(b) no 36 LKVD.

Produsaun ba prova sira

Iha prosesu julgamentu, arguidu deklara katak faktu ne'ebé akuza ba arguidu ne'e loos hotu, di'ak malu ona, arrepende ninia hahalok, depoisde akontese to'o agora la baku ona ofendida no serbisu nu'udar agrikultór rendementu la fiksu.

Alende ne'e, tribunal la rona lezada tanba ofendida kondisaun moras hela, tanba foin partu semana ida, tanba ne'e tribunál hasai ninia despaixu presinde tiha ofendida.

Alegasaun finál

Prokuradór haktuir katak haree ba iha produsaun ba prova, arguidu konfesa faktu ne'ebé akuza ba nia, mezmú sira di'ak malu ona maibé nafatin atu prevene arguidu nia konduta iha futuru atu labele halo tan agresaun hasoru ofendida, husu ba tribunál kondena arguidu ho pena prizaun tinan ida suspende ba tinan ida.

Entretantu, defeza haktuir katak iha produsaun ba prova arguidu konfesa faktu ho integralmente, di'ak malu ona ho lezada, arrepende ninia hahalok no foin primeiravés mai hatan iha tribunál, nune'e husu ba tribunál atu kondena arguidu ho pena multa.

Desizaun

Depoisde avalia faktu hotu, tribunál prova katak arguidu tebe dala ida lezada nia kelen parte loos.

Bazeia ba faktu provadu sira ne'e no tetu mós ho sirkunstánsia agravante hanesan arguidu halo agresaun hasoru nia feen rasik ho sirkunstánsia atenuante sira hanesan arguidu konfesa faktu sira, arrepende ninia hahalok, di'ak malu ona ho lezada no foin primeiravés mai hatan iha tribunál, nune'e tribunál konklui prosesu ne'e no kondena arguidu ho pena multa US\$45.00 ne'ebé arguidu sei selu US\$1.00 kada loron durante loron 45. Tribunál mós fiksa pena alternativa durante loron 30 prizaun, bainhira arguidu la kumpri pena multa refere.

3. Krime danu simples

Nú. Prosesu : 0233/23. BCBCV
Kompozisaun Tribunál : Singulár
Juísa : Dra. Maria Modesta d. A. Viera
Prokuradór : Dr. Bartolomeu de Araújo
Defeza : Dr. António Fernandes
Desizaun : Kondena kada arguidu ho pena prizaun fulan 3
suspende ba tinan 1

Iha 10 Outubru 2024, Tribunál Judisiál Primeira Instánsia Baukau prezide leitura sentensa ba krime danu simples ne'ebé envolve arguidu Julio da Costa, Francisco da Costa, Augustu da Costa, Domingos da Costa hasoru ofendida Aquilina Purificação Martins, iha Postu Administrativu Baukau Vila, Munisípiu Baukau.

Akuzasaun Prokuradór

Prokuradór akuza katak iha 19 Outubru 2023, iha oras tuku 15:17 lokraik, ofendida haruka sasin Juliaõ da Costa konstrui fali ofendida nia dapur ne'ebé la iha kondisaun atu uza, derepente arguidu sira mosu mai hapara serbisu ne'ebé sasin halo hela no arguidu sira baku estraga obra ne'ebé sasin halo hela. Arguidu sira nia konduta ne'e estraga sasan ne'ebé pertense ba ofendida nian ho valor osan hamutuk US\$945.00.

Prokuradór akuza arguidu sira koa-autor kontra artigu 258 KP kona-ba danu simples ho nia moldura penál to'o tinan 3 ka multa.

Produsaun ba prova sira

Iha prosesu julgamentu, arguidu Francisco da Costa no Augustu da Costa hili direitu nonook.

Entretantu arguidu Julio da Costa deklara katak faktu ne'ebé akuza ba sira ne'e loos hotu katak sira estraga duni ai-rin (besi kotak) hamutuk lima ne'ebé hari'i

ona. Antes ne'e arguidu avizu ona kuaze dala rua ka tolu, arguidu haree liu lora lima hanesan ne'e mak arguidu haree badaen harii ona ai-riin ne'e mak sira ba hapara no estraga sasan refere.

Arguidu Domingos da Costa deklara katak momentu ne'e, ba hotu fatin akontesementu maibe nia parte la estraga buat ruma, arguidu haree basia ida mak hatuur iha ninia kintal laran ne'e mak arguidu foti basia refere tau di'ak tiha.

Iha parte seluk ofendida kontinua konfirma faktu hotu iha akuzasaun no deklara katak iha akontesimentu ne'e arguidu Julio foti mareta iha badaen nia oin hodi baku ai-rin sira ne'ebé hari'i tiha ona no besi sira iha leten mós monu tun hotu. ai-rin hamutuk lima mak arguidu sira baku estraga. Prejuizu durante lakon despensa, no selu badaen ho valor osan hamutuk US\$945.00.

Testemuña Juliao da Costa nu'udar badaen depoimentu katak momentu halo hela uma, derepente arguidu sira mosu dehan para lai kontrusaun no kontinua baku estraga ai-rin hamutuk lima ne'ebé testemuña ho nia maluk sira hari'i, testemuña ho nia mlauk nain haat kontratu halo kontrusaun to'o hotu selu US\$1,500.00 tanba serbisu to'o klaran lezada selu sira US\$500.00.

Alegasaun finál

Prokurador haktuir katak iha produsaun ba prova arguidu nain rua hili direitu nonook maibe haree ba arguidu Julio da Costa nia deklarasaun katak sira esforsu hamutuk hodi estraga ofendida nia sasan, lezada no testemuña mai konfirma akuzasaun katak akuzasaun prokurador prosedente provadu prosesu ba kazu sivil mós agora dadauk iha ona tribunál, atu prevene arguidu sira nia konduta labele halo tan hahalok ne'e, husu ba tribunál atu kondena arguidu sira ho pena prizaun fulan tolu suspende ba tinan ida.

Entretantu, defeza haktuir katak haree ba produsaun prova arguidu sira estraga duni ofendida nia sasan, maibe ninia valor prejuizu mak la klaru tanba ne'e indemnizasaun sivil husu hatama asaun sivil ba tribunál. Kona ba krime danu simples husu ba tribunal fó pena ne'ebé justu ba arguidu sira.

Desizaun

Depoizde avalia faktu hotu, tribunál prova katak faktu sira iha akuzasaun ne'e provadu hotu.

Bazeia ba faktu provadu sira ne'e no tetu mós ho sirkunstánsia atenuante sira hanesan arguidu balun konfesa faktu sira, arrepende sira nia hahalok no foin primeiravés mai hatan iha tribunál, nune'e tribunál konklui prosesu ne'e no kondena kada arguidu ho pena prizasaun fulan haat suspende ba tinan ida.

4. Krime ofensa ba integridade fizika simples ho natureza violénsia doméstika

Nú. Prosesu : 0139/23. BCBCV
Kompozisaun Tribunál : Singulár
Juis : Dr. Samuel da Costa Pacecho

Prokuradór : Dr. Ambrósio Rangel Freitas
Defeza : Dr. Germano Guterres Ramos
Desizaun : Pena prizaun fulan 3 suspende ba tinan 1

Iha 07 Outubru 2024, Tribunál Judisiál Primeira Instánsia Baukau prezide leitura sentensa ba krime ofensa ba integridade fízika simples ho natureza VD ne'ebé envolve arguidu SMdP hasoru nia feen, iha Munisípiu Baukau.

Akuzasaun Prokuradór

Prokuradór akuza katak, iha 23 Juñu 2023, maiszumenus iha oras tuku 07:00 kalan, arguidu tuku dala ida iha ofendida nia kabun parte karuk, tuku dala ida kotuk laran, tuku dala ida iha ulun no tebe dala ida iha ofendida nia kabun parte loos rezulta moras. Antes ne'e arguidu ho ofendida diskute malu tanba ofendida deskonfia arguidu amante ho feto seluk.

Prokuradór akuza arguidu kontra artigu 145 KP kona ba ofensa ba integridade ba fízika simples ho nia moldura penál tinan 3 ka multa konjuga ho artigu 2,3, 35(b) no 36 LKVD.

Produsaun ba prova sira

Iha prosesu julgamento, arguidu deklara katak faktu iha akuzasaun ne'e loos hotu katak halo duni agresaun hasoru ofendida, depooisde akontese sira di'ak malu ona, arrepende ninia hahalok, promete ba tribunál sei la repete hahalok ne'e iha futuro no foin primeiravés mai hatan iha tribunál.

Alende ne'e, ofendida kontinua konfirma faktu hotu iha akuzasaun no deklara mós katak arguidu foin primeiravés baku ofendida no sira di'ak malu fali ona.

Alegasaun finál

Prokuradór konsideira arguidu provadu komete krime hasoru ofendida bazeia ba konfisaun arguidu nian no konfirma mós hosi ofendida, tanba ne'e husu ba tribunál atu aplika pena multa US\$60 no ka loron selu US\$1.00.

Entretantu defeza husu ba tribunál atu fó pena ne'ebé adekuaudu ba arguidu tanba arguidu konfesa faktu hotu ne'ebé inputa ba arguidu, arrepende ninia hahalok no promete sei la komete tan hahalok aat ne'e iha futuro.

Desizaun

Depoisde avalia faktu hotu, tribunál prova katak arguidu tuku dala ida iha ofendida nia kabun parte karuk, tuku dala ida iha kotuk laran, tuku dala ida iha ulun no tebe dala ida iha kabun parte loos.

Bazeia ba faktu provadu sira ne'e no tetu mós ho sirkunstánsia atenuante sira hanesan arguidu konfesa faktu sira, arrepende ninia hahalok, di'ak malu ona ho ofendida no foin primeiravés mai hatan iha tribunál, nune'e tribunál konklui prosesu ne'e no kondena arguidu ho pena prizaun fulan tolu suspende ba tinan ida.

5. Krime danu simples no ameasa

Nú. Prosesu : 0024/24.PDBAU

Kompozisaun Tribunál : Singulár
Juís : Dr. Samuel da Costa Pacecho
Prokurador : Dr. Ambrósio Rangel Freitas
Defeza : Dr. Germano Guterres Ramos
Dezisaun : Kondena arguida Jacinta ho pena multa US\$30.00
no kondena arguidu Francisco ho pena
admoestasau

Iha 10 Outubru 2024, Tribunál Judisiál Primeira Instánsia Baukau, prezide leitura sentensa ba krime danu simples no ameasa ne'ebé envolve arguidu Francisco Freitas no Jacinta Carlota Marques hasoru ofendida Brigida Da Silva, iha Postu Administrativu Baukau Vila, Munisípiu Baukau.

Akuzasaun Prokuradór

Prokuradór akuza katak iha 27 Janeiru 2024, iha oras tuku 10 dadeer, arguida Jacinta fokit ofendida nia talas hun 2, silu estraga tiha hudi hun ida.

Tuir mai iha 02 Feveireiru 2024, iha oras tuku 5 lokraik, ofendida iha hela to'os laran arguida Jacinta ba fokit tan ofendida nia talas hun ruanulu resin ida (21) depois arguida hateten ba ofendida katak ferik ona moe laiha, iha akontesimentu ne'e arguidu Francisco toba hela no hader mai foti ai-sar atu baku ofendida maibé la konsege no hateten ba ofendida katak "*hau moras toba ladi' ak orsida hau baku mate ó*", ho liafuan ne'e halo ofendida ta'uk no la seguru.

Prokuradór akuza arguida Jacinta kontra artigu 258 KP kona-ba danu simples ho nia moldura penál tinan 3 ka multa no arguidu Francisco kontra artigu 157 KP kona-ba ameasa ho nia moldura penal tinan 1 ka multa.

Produsaun ba prova sira

Iha produsaun ba prova, arguidu no arguida deklarata katak faktu iha akuzasaun ne'e loos hotu, arrepende sira nia hahalok no foin primeiravés mai hatan iha tribunál.

Alende ne'e, ofendida konfirma faktu sira iha akuzasaun no deklarata tan katak ai-han sira ne'ebé sira estraga ne'e mak baibain ofendida uza ba sustenta nia moris.

Alegasaun finál

Prokuradór haktuir katak, arguidu na'in rua provadu komete krime ne'ebé inputa ba sira, arguidu Francisco komete krime ameasa hasoru ofendida entretantu arguida Jacinta komete krime danu simples hasoru ofendida. tanba ne'e husu ba tribunál kondena kada arguidu no arguida ho pena multa US\$30.00

Entretantu, defeza haktuir katak arguidu sira konfesa faktu hotu ne'ebé inputa ba sira, arrepende sira nia hahalok no foin primeiravés mai hatan iha tribunál. Tanba ne'e husu ba tribunal fó pena ne'ebé adekuadu ba arguidu no arguida.

Desizaun

Depoisde avalia faktu hotu, tribunál prova katak arguida Jacinta fokit ofendida nia talas hun sanulu resin tolu, silu estraga tiha hudi hun ida no arguidu Francisco ameasa ofendida dehan atu baku mate.

Bazeia ba faktu provadu sira ne'e no tetu mós ho sirkunstánsia atenuante sira hanesan arguidu na'in rua konfesa faktu sira, arrepende sira ninia hahalok no foin primeiravés mai hatan iha tribunál, nune'e tribunál konklui prosesu ne'e no kondena arguida Jacinta ho pena multa US\$30.00 ne'ebé arguidu sei selu 0.50 Sentavus kada loron durante loron 60. Tribunál mós fiksa pena alternativa durante loron 40 prizaun, bainhira arguida la kumpri pena multa no selu mós indemnizasaun sivil ho valór osanUS\$20.00 ba ofendida no kondena arguidu Francisco ho pena admoestasaun.

6. Krime omisídiu negligente

Nú.Prosesu : 0397/23.BCSTR
Kompozisaun Tribunál : Singulár
Juis : Dra. Maria Solana da Conceição Freitas
Prokuradór : Dr. Bartolomeu de Araújo
Defeza : Dr. António Fernandes
Desizaun : Pena prizaun tinan 2 suspende ba tinan 2

Iha 10 Outubru 2024, Tribunál Judisiál Primeira Instánsia Baukau prezide leitura sentensa ba krime omisídiu negligente ne'ebé envolve arguidu Celestino Neto Viera hasoru Tereza Soares iha bundaran Vila Nova Baukau, Munisípiu Baukau.

Akuzasaun Prokuradór

Prokuradór akuza katak iha 25 Agostu 2023, maiszumenus iha oras tuku 16:00 lokraik, arguidu Celestino kondus kareta Grand Max kor mutin ho xapa matrikúla 16.551 A hosi diresaun Planalto mai iha rotunda Villa-Nova Baukau halai ho velocidade maka'as soke kareta tanki ho nia xapa matrikula 5588 TL kontinua ba soke ofendida ne'ebé faan hela sasan iha estrada ninin, hosi asidente ne'e rezulta ofendida konsege lori ba Óspital Rejionál Eduardo Ximenes maibé labele salva ofendida nia vida. Arguidu ho família ofendida halo ona akordu konjunta katak arguidu ho kareta na'in ajuda ona família ofendida nian ba serimonia funebre. Parte ofendida nia família ho motorista no proprietariu ba kareta grand max halo ona akordu konjunta ajuda família ofendida nian ba serimonia funebre.

Prokuradór akuza arguidu kontra artivu 140 KP kona-ba omisídiu negligente ho nia moldura penal tinan 4 ka multa.

Produsaun ba prova sira

Iha prosesu julgamentu, arguidu konfesa faktu sira iha akuzasaun no deklarata katak iha momentu ne'eba kareta ne'e kondisaun di'ak hela mak nia lori atu ba hola minarai maibé derepente deit nia atu trava ladi'ak, tanba aselerador habit/belit metin tiha de'it no halai maka'as liu rezulta soke kareta tanki no kontinua soke ofendida. Arguidu hamutuk ho nia patraun halo ona akordu ho família ofendida nian relasiona serimonia fúnebre ofendida nian.

Alegasaun finál

Prokuradór haktuir katak akuzasaun prokuradór prosedente provadu tanba arguidu nia konduta falta kuidadu ba kareta nia kondisaun, nune'e soke ofendida rezulta ofendida lakon vida, mezmu la'os ho intensaun maibé ho arguidu nia neglijensia rezulta ofendida lakon vida. Arguidu ho kareta na'in mós ajuda ona ofendida ninia serimonia funebre. Tanba ne'e husu ba tribunál atu kondena arguidu ho pena multa US\$90.00 no kada loron sei selu US\$1.00 no husu mós atu devolve fali objeitu ba arguidu.

Entretantu defeza haktuir katak arguidu rekoñese nia hahalok sira no arguidu no kareta nian ho ofendida ninia família hamutuk hodi hakoi ofendida ninia mate isin, nune'e husu ba tribunál fó pena ne'ebé adekuadu ba arguidu.

Desizaun

Depoisode avalia faktu hotu, tribunál prova katak faktu iha akuzasaun prokuradór provadu hotu no arguidu ho kareta na'in mós ajuda ona ofendida ninia serimonia funebre.

Bazeia ba faktu provadu sira ne'e no tetu mós ho sirkunstánsia atenuante sira hanesan arguidu konfesa faktu sira, arrepende ninia hahalok no foin primeiravés mai hatan iha tribunál, nune'e tribunál konklui prosesu ne'e no kondena arguidu ho pena prizaun tinan rua suspoende ba tinan rua.

7. Krime ofensa ba integridade física simples ho natureza violénsia doméstika

Nú. Prosesu	: 0025/20. VQOSU
Kompozisaun Tribunál	: Singulár
Juísa	: Dra. Maria Solana da Conceição Fernades
Prokuradór	: Dr. Ambrósio Rangel Freitas
Defeza	: Dr. Germano Guterres Ramos
Desizaun	: Pena admoestasaun

Iha 14 Outubru 2024, Tribunál Judisiál Primeira Instánsia Baukau prezide leitura sentensa ba krime ofensa ba integridade física simples ho natureza VD ne'ebé envolve arguidu MadS ho idade (tinan 65) hasoru nia feen ho idade (tinan 60), iha Munisípiu Vikeke.

Akuzasaun Prokuradór

Prokuradór akuza katak iha 13 Outubru 2023, iha oras tuku 16:30 lokraik, arguidu foti kadeira masa baku dala ida iha ofendida nia kabaas, foti ai-kakeu nia sanak baku dala ida iha ofendida nia ulun no ofendida ba halo tratamentu iha Sentru Saúde Ossu no suku pontu sanulu. Antes ne'e, arguidu ho ofendida diskute malu kona-ba ofendida tein hahan tarde.

Prokuradór akuza arguidu kontra artigu 145 KP kona-ba ofensa ba integridade física simples ho nia moldura penál to'o tinan 3 ka multa no konjuga ho artigu 2, 3, 35(b) no 36 LKVD.

Produsaun ba prova sira

Iha prosesu julgamentu, arguidu deklara katak faktu iha akuzasaun ne'e loos hotu, arguidu deklara tan katak idozu ona, iha ona bei-oan, foin primeiravés halo agresaun hasoru ofendida, depoisde akontese hanoin fali ofendida tanba durante moris hamutuk oan sira forma hotu ona família mak foin halo fali hahalok hanesan ne'e hasoru ofendida, arguidu sente moe no arrepende.

Alende ne'e, ofendida konfirma ba faktu sira iha akuzasaun no deklara tan katak depoisde akontese sira di'ak malu ona, sira forma família iha tinan barak ona, oan sira forma hotu ona família foin arguidu baku ofendida no to'o agora la baku ona ofendida.

Alegasaun finál

Prokuradór haktuir katak akuzasaun prokuradór prosedente provadu tanba hetan konfirmasaun hosi arguidu no ofendida perante tribunál, durante moris hamutuk to'o idade idozu hotu ona mak foin mosu dezintendimentu/mosu problema, arguidu sente moe no arrepende, haree ba sirkunstánsia atenuante sira ne'e husu ba tribunál fó pena admoestasaun ba arguidu.

Alende ne'e, defeza iha ninia alegasaun konkorda ho procurador ninia alegasaun atu kondena arguidu ho pena admoestasaun.

Desizaun

Depoisde avalia faktu hotu, tribunál prova katak arguidu foti kadeira masa baku dala ida iha ofendida nia kabaas, foti ai-kakeu nia sanak baku dala ida iha ofendida nia ulun no hetan suku pontu sanulu.

Bazeia ba faktu provadu sira ne'e no tetu mós ho sirkunstánsia atenuante sira hanesan arguidu konfesa faktu sira, arrepende ninia hahalok, di'ak malu ona ho lezada no foin primeiravés mai hatan iha tribunál, arguidu idade idozu ona, arguidu kondisaun moras nune'e tribunál konklui prosesu ne'e no kondena arguidu ho pena admoestasaun

8. Krime omisídiu negligente

Nú.Prosesu	: 0435/23. BCSTR.
Kompozisaun Tribunál	: Singulár
Juis	: Dra. Maria Solana da Conceição Freitas
Prokuradór	: Dr. Bartolomeu de Araújo
Defeza	: Dr. Grigorio M. L. de Lima
Desizaun	: Pena prizaun tinan 2 suspende ba tinan 2

Iha 15 Outubru 2024, Tribunál Judisiál Primeira Instánsia Baukau prezide leitura sentensa ba krime omisídiu negligente ne'ebé envolve arguidu Jose Da Costa Marçal hasoru ofendidu pedro da Cruz, iha área estrada publika Posto Administrativu Laga Munisípiu Baukau.

Akuzasaun Prokuradór

Prokuradór akuza katak iha Segunda-feira, 11 Dezembru 2023, iha oras tuku 10:17 otl, iha Área Estrada Pública Laga, arguidu konduz kameonota bo'ot ho xapa matríkula A 52-375 hosi Diresaun Larifanu mai Laga. Bainhira arguidu atu ultrapasa mikrolet ne'ebé estasiona iha oin, ofendidu hosi dirasaun Lautein

kose kameonota nia roda, nune'e ofendidu monu baku liman karuk rezulta tohar, kanek iha ain, no pankada iha reen-toos, haree katak ofendida grave nune'e lori ba halo tratamentu iha HOREX, ikus mai labele salva ofendida nia vida. Família ofendida ho arguidu halo akordu hodi hamutuk halot mate isin, arguidu ho nia família iha sentimentu no konsiderasaun hanesan umanu ba iha ofendida nia hela fatin hodi fó sentidu kondelensia no mós fo ajuda sasan ba família ofendida ba serimonia funebre.

Prokuradór akuza arguidu kontra artigu 140 KP kona-ba omisídiu negligente ho nia moldura penál tinan 4 ka multa.

Produsaun ba prova sira

Iha prosesu julgamento, arguidu konfesa faktu sira iha akuzasaun no deklarata katak iha momentu ne'eba nia konsentra liu ba mikrolet rua ne'ebé iha oin atu ultrapasa no la haree ofendida ne'ebé iha kotuk, derepente tarutu mak arguidu hakfodak no haree katak soke ofendida no monu nune'e arguidu ajuda tula ba ospital. Arguidu mós hatutan tan katak sira ho família ofendida ko'alia tuir malu no halo akordu hodi hamutuk haloot mate isin no arguidu ho nia família fó apoiu solidariedade ajuda família ba nia última residencia.

Alegasaun final

Prokuradór haktuir katak arguidu konfesa integralmente ba faktu sira, akontese arguidu tula kedas ofendida ba ospital, nune'e prokuradór intende katak arguidu provadu komete omisídiu negligente ne'ebé imputa ba arguidu. Tanba ne'e, husu ba tribunál atu kodena arguidu ho pena multa US\$40.00.

Entretantu, defeza haktuir katak arguidu rekuñese nia hahalok sira no arguidu kontribui no kolabora hoofendida nia família sira hamutuk hodi hakoi mate isin, nune'e husu ba tribunál fó pena ne'ebé adekuadu ba arguidu.

Desizaun

Depoizde avalia faktu hotu, tribunál prova katak faktu iha akuzasaun provadu hotu no arguidu mós ajuda ona família vitima ba serimonia funebre matebian nia.

Bazeia ba faktu provadu sira ne'e no tetu mós ho sirkunstánsia atenuante sira hanesan arguidu konfesa faktu sira, arrepende ninia hahalok no foin primeiravés mai hatan iha tribunál, nune'e tribunál konklui prosesu ne'e no kondena arguidu ho pena prizaun tinan rua suspende ba tinan rua.

9. Krime ofensa ba integridade fizika simples ho natureza violénsia doméstika

Nú.Prosesu	: 0014/24.PDBAU
Kompozisaun Tribunal	: Singulár
Juísa	: Dra. Maria Solana da Conceição Fernades
Prokurador	: Dr. Bartolomeu de Araújo
Defeza	: Dr. António Fernandes
Desizaun	: Pena multa US\$60.00

Iha 17 Outubru 2024, Tribunál Judisiál Primeira Instánsia Baukau, prezide julgamentu leitura sentensa ba krime ofensa ba integridade física simples ho natureza VD ne'ebé envolve arguidu MFdC hasoru nia feen, iha Munisípiu Baukau.

Akuzasaun Prokuradór

Prokuradór akuza katak 03 Janeiru 2024, iha oras tuku 17:00 lokraik, ofendida kuu ai-dila okir atu halo modo, arguidu hakilar dehan se mak haruka kuu ai-dila ne'e, rona ida ne'e ofendida halai tama uma laran tanis no ko'alia dehan *"haú ne' e ó nia asu ga, mak ó hakilar hanesan ne' e/ó iha feto seluk mak hare ha' u matan la mós"*, nune'e arguidu ho ofendida diskute malu arguidu lori ai-sar baku ofendida nia ulun rezulta moras no bubu.

Prokuradór akuza arguidu kontra artigu 145 KP kona ba ofensa ba integridade ba física simples ho nia moldura penál to'o tinan 3 ka multa konjuga ho artigu 2,3, 35(b) no 36 LKVD.

Produsaun ba prova sira

Iha prosesu julgamentu, arguidu deklara katak faktu sira iha akuzasaun ne'e loos hotu, arguidu mós no deklara tan katak depoisde akontesementu ofendida ba hela iha Uma-mahon, liu loron tolu fila fali ba uma hafoin família sira rezolve no di'ak malu ona to'o agora, arrepende nia hahalok no husu ona deskulpa ba ofendida.

Alende ne'e, ofendida kontinua konfirma faktu hotu iha akuzasaun no deklara katak depoisde akontesementu ne'e sira dia'k malu ona no arguidu la baku ona ofendida to'o agora.

Alegasaun finál

Prokuradór haktuir katak akuzasaun prokuradór prosedente provadu, bazeia ba arguidu no ofendida nia konfisaun ne'ebé konfirma akuzasaun ho totalmente, tanba ne'e husu ba tribunál atu aplika pena prizaun fulan rua suspende ba tinan ida.

Entretantu, defeza haktuir katak arguidu konfesa faktu hotu iha akuzasaun, arrepende ona nia hahalok. Tanba ne'e husu ba tribunal atu aplika pena ne'ebé mais adekua ba arguidu.

Desizaun

Depoisde avalia faktu hotu, tribunál prova katak arguidu lori ai-sar baku ofendida nia ulun.

Bazeia ba faktu provadu sira ne'e no tetu mós ho sirkunstánsia atenuante sira hanesan arguidu na'in rua konfesa faktu sira, arrepende sira ninia hahalok no foin primeiravés mai hatan iha tribunál, nune'e tribunál konklui prosesu ne'e no kondena arguida Jacinta ho pena multa US\$60.00 ne'ebé arguidu sei selu US\$1.00 kada loron durante loron 60. Tribunál mós fiksa pena alternativa durante loron 40 prizaun, bainhira arguidu la kumpri pena multa refere.

10. Krime ofensa ba integridade física simples ho natureza violência doméstica

Nú. Prosesu : 0002/24. BCEVN
Kompozisaun tribunál : Singulár
Juis : Dr. Maria Solana da Concicao das Neves
Prokuradór : Dr. Bartolomeu de Araújo
Defeza : Dr. Germano Guterres Ramos
Desizaun : Pena multa US\$60.00

Iha 21 Outubru 2024, Tribunál Judisiál Primeira Instáncia Baukau prezide julgamentu leitura sentensa ba krime ofensa ba integridade física simples ho natureza VD ne'ebé envolve arguidu MdSX hasoru nia oan feto, iha Munisípiu Baukau.

Akuzasaun Prokuradór

Prokuradór akuza katak iha 03 Janeiru 2024, iha oras tuku 10:00 dadeer, iha tempu ne'eba arguidu mosu derepente iha uma la ko'alia liafuan ruma direitamente dada ofendida nia liman no dulas, basa dala rua iha kanuruk, tuku dala tolu iha kotuk laran tebe dala rua iha kelen parte karuk no tebe dala rua iha kotuk laran.

Prokuradór akuza arguidu kontra artigu 145 KP kona-ba ofensa ba integridade física simples ho moldura penál to'o tinan 3 ka multa no konjuga ho artigu 2, 3 no 35 LKVD.

Produsaun ba prova sira

Iha prosesu julgamentu, arguidu deklarara katak faktu iha akuzasaun ne'e loos hotu, ofendida nu'udar arguidu nia oan feto sigundu no razaun baku tanba ofendida nu'udar feto halo tuir mane ba fali mane nia uma ne'e mak arguidu hirus, arrepende ninia hahalok no arguidu nu'udar agrikultór rendimentu la fiksi.

Depoisde rona deklarasaun hosi arguidu, prokuradór husu ba tribunál atu presinde tiha ofendida nia deklarasaun tanba arguidu konfesa faktu hotu iha akuzasaun, nune'e prova ne'ebé presiza suficiente ona. Relasiona ho pedidu ne'e, defeza konkorda ho prokuradór nia pedidu. Tribunál bazeia ba pedidu ne'e konklui hodi presinde ofendida nia deklarasaun.

Alegasaun final

Prokuradór haktuir katak akuzasaun prokuradór prosendente provadu bazeia ba arguidu nia deklarasaun konfirma totalmente ba akuzasaun sein rezerva mezmu arguidu nu'udar aman atu fó hanoin maibé aktu ne'ebé arguidu uza ne'e mak krime, tanba ne'e husu ba tribunál atu kondena arguidu ho pena prizaun tinan ida suspende ba tinan ida.

Entretantu, parte defeza haktuir katak arguidu nu'udar aman iha devér morál atu fó atensaun ba ofendida nu'udar feto tanba ofendida la rona arguidu nu'udar aman ne'e mak arguidu hirus halo agresan hasoru ofendida, haree ba razaun sira ne'e husu ba tribunál fó pena justu ba arguidu.

Desizaun

Depoisde avalia faktu hotu, tribunál prova katak arguidu dada lezada nia liman dulas, basa dala rua iha kanuruk, tuku dala tolu iha kotuk laran tebe dala rua iha kelen parte karuk no tebe dala rua iha kotuk laran.

Bazeia ba faktu provadu sira ne'e no tetu mós ho sirkunstánsia atenuante sira hanesan arguidu konfesa faktu sira, arrepende ninia hahalok, di'ak malu ona ho ofendida no foin primeiravés mai hatan iha tribunál, nune'e tribunál konklui prosesu ne'e no kondena arguidu ho pena multa US\$60.00 ne'ebé arguidu sei selu US\$1.00 kada loron durante loron 60. Tribunál mós fiksa pena alternativa durante loron 40 prizaun, bainhira arguidu la kumpri pena multa refere.

11. Krime ofensa ba integridade física simples ho natureza violéncia doméstika

Nú. Prosesu	: 0002/24. BCEVN
Kompozisaun tribunál	: Singulár
Juis	: Dra. Maria Solana da Concicao das Neves
Prokuradór	: Dr. Bartolomeu de Araújo
Defeza	: Dr. Celestino Guterres
Desizaun	: Pena multa US\$45.00

Iha 21 Outubru 2024, Tribunál Judisiál Primeira Instánsia Baukau prezide leitura sentensa ba krime ofensa ba integridade física simples ho natureza VD ne'ebé envolve arguidu JCdJR hasoru nia feen, iha Munisípiu Baukau.

Akuzasaun Prokuradór

Prokuradór akuza katak iha 05 Janeiru 2024, iha oras tuku 17:00 lokraik arguidu lori ai-kakeu ida baku dala ida ofendida nia ain tuur rezulta moras no bubu. Antes ne'e, arguidu ho ofendida diskute malu kona-ba nonton video iha telemovél

Prokuradór akuza arguidu kontra artigu 145 KP kona-ba ofensa ba integridade física simples ho moldura penál to'o tinan 3 ka multa no konjuga ho artigu 2, 3(a) no 35 (b) LKVD.

Produsaun ba prova sira

Iha prosesu julgamentu, arguidu deklara katak faktu iha akuzasaun ne'e loos hotu, razaun arguidu baku tanba diksute malu kona-ba haree telefone, di'ak malu perante família, foin primeiravés baku ofendida, promete la baku tan ofendida iha futuro, arguidu nu'udar agrikultór la iha rendimentu fiku.

Alende ne'e, ofendida mós konfirma faktu sira iha akuzasaun no deklara tan katak ofendida karega hela telefone arguidu hakarak haree telefone (nonton) filme baku malu, maibé lezada hatan hein lai derepente arguidu foti ai-kakeu baku ba ofendida nia ain-tuur, depoisde akontese sira di'ak malu ona perante família sira no to'o agora la baku ona lezada.

Alegasaun finál

Prokuradór haktuir katak arguidu konfesa ba faktu hotu iha akuzasaun no konfirma mós hosi ofendida, prokuradór haree katak arguidu nia aktu priense duni ba faktu ne'ebé imputa ba arguidu, depoisde akontesimentu kontinua moris hamutuk hanesan feen ho la'en nune'e prokuradór husu ba tribunál atu aplika pena prizaun fulan ida suspende ba tinan ida.

Entretantu parte defeza haktuir katak faktu iha akuzasaun provadu haree ba arguidu nia konfiksaun no ofendida nia konfirmasaun ba akuzasaun, sira di'ak malu ona arrepende ba ninia hahalok, husu ba tribunál absolve arguidu hosi prosesu.

Desizaun

Depoisde avalia faktu hotu, tribunál prova katak arguidu lori ai-kakeu ida baku dala ida iha ofendida nia ain-tuur rezulta moras no bubu.

Bazeia ba faktu provadu sira ne'e no tetu mós ho sirkunstánsia atenuante sira hanesan arguidu konfesa faktu sira, arrepende ninia hahalok, di'ak malu ona ho ofendida no foin primeiravés mai hatan iha tribunál, nune'e tribunál konklui prosesu ne'e no kondena arguidu ho pena multa US\$45.00 ne'ebé arguidu sei selu US\$1.00 kada loron durante loron 45. Tribunál mós fiksa pena alternativa durante loron 30 prizaun, bainhira arguidu la kumpri pena multa refere.

12. Krime ofensa ba integridade fízika simples ho natureza violénsia doméstika

Nú.prosesu	: 0014/23. VQVQQ
Kompozisaun Tribunál	: Singulár
Juísa	: Dra. Maria Modesta d. A. Viera
Prokuradór	: Dr. Ambrósio Rangel Freitas
Defeza	: Dr. Sidónio Maria sarmento
Desizaun	: Pena prizaun fulan 6 suspende ba tinan 1

Iha 21 Outubru 2024, Tribunál Judisiál Primeira Instánsia Baukau, prezide julgamentu leitura sentensa ba krime ofensa ba integridade fízika simples ho natureza VD ne'ebé envolve arguidu PG, iha Munisípiu Vikeke.

Akuzasaun Prokuradór

Prokuradór akuza katak, loron no fulan haluha maibé iha tinan 2020, arguidu basa dala rua iha ofendida nia hasan.

Tuir mai iha 31 Marsu 2023, iha oras tuku 06:25 dadeer, arguidu uza kadeira baku dala rua iha ofendida nia kabun parte karuk no uza fiu eletrisidade baku dala rua iha ofendida nia ulun. Antes ne'e, arguidu ho lezada diskute malu koba-ba ofendida ba misa fila tarde ba uma no husik sira nia oan ki'ik oan mesak tanis iha uma.

Prokuradór akuza arguidu komete krime iha konkursu kontra artigu 145 KP kona-ba ofensa ba integridade fízika simples ho nia moldura penál to'o tinan 3 ka multa no konjuga ho artigu 2, 3, 35(b) no 36 LKVD.

Produsaun ba prova sira

Iha prosesu julgamentu, arguidu konfesa faktu hotu iha akuzasaun, di'ak malu ona, arrepende nia hahalok, foin primeiravés mai hatan iha tribunál arguidu serbisu nu'udar matadoru/faan na'an karau kada fulan bele hetan osan US\$200.00.

Depoizde rona deklarasaun hosi arguidu, prokuradór husu ba tribunál atu presinde tiha ofendida nia deklarasaun tanba arguidu konfesa faktu hotu iha akuzasaun, nune'e prova ne'ebé presiza suficiente ona. Relasiona ho pedidu ne'e, defeza konkorda ho prokuradór nia pedidu. Tribunál bazeia ba pedidu ne'e konklui hodi presinde ofendida nia deklarasaun.

Alegasaun finál

Prokuradór haktuir katak arguidu komete krime ne'ebé imputa ba nia ho ninia agravaasaun hanesan arguidu halo agresaun hasoru lezada nu'udar nia feen, ho atenuante sira mezmú arguidu di'ak malu ona ho lezada maibé husu ba tribunál nafatin fó kondenasaun mezmú iha regra atu aplika pena multa ba arguidu maibé arguidu nia aktu ne'e husu ba tribunál atu kondena arguidu ho pena prizaun tinan ida suspende ba tinan ida.

Entretantu, defeza haktuir katak arguidu konfesa faktu hotu iha akuzasaun, arrepende nia hahalok. Tanba ne'e husu ba tribunál atu aplika pena ne'ebé kmaan ba arguidu.

Desizaun

Depoizde avalia faktu hotu, tribunál konsidera akuzasaun prokuradór nian provadu hotu.

Bazeia ba faktu provadu sira ne'e no tetu mós ho sirkunstánsia atenuante sira hanesan arguidu na'in rua konfesa faktu sira, arrepende sira ninia hahalok no foin primeiravés mai hatan iha tribunál, nune'e tribunál konklui prosesu ne'e no kondena arguidu ho pena prizaun fulan neen suspende ba tinan ida.

13. Krime ofensa ba integridade física simples ho natureza violénsia doméstika

Nú. Prosesu	: 0045/23. VQVQQ
Kompozisaun Tribunál	: Singulár
Juísa	: Dra. Maria Modesta d. A. Viera
Prokuradór	: Dr. Ambrósio Rangel Freitas
Defeza	: Dr. Sidónio Maria Sarmento
Desizaun	: Pena multa US\$45.00

Iha 21 Outubru 2024, Tribunál Judisiál Primeira Instánsia Baukau prezide leitura sentensa ba krime ofensa ba integridade física simples ho natureza VD ne'ebé envolve arguidu BS hasoru nia feen, iha Munisípiu Vikeke.

Akuzasaun Prokuradór

Prokuradór akuza katak iha, 05 Agostu 2023, iha oras tuku 08:00 dadeer arguidu tebe dala ualu iha ofendida nia kotuk laran, tuku dala rua iha matan no basa dala haat oin laran, basa dala haat iha kabaas, tuku dala ida iha tilun hun rezulta ofendida monu ba rai hafoin arguidu sama tan ofendida nia hirus matan. Antes ne'e, arguidu ho ofendida diskute malu kona-ba ofendida uza whatsapp hodi komunika ba nia maluk sira.

Prokuradór akuza arguidu kontra artigu 145 KP kona-ba ofensa ba integridade fizika simples ho nia moldura penal to'o tinan 3 ka multa no konjuga ho artigu 2, 3, 35(b) no 36 LKVD.

Produsaun ba prova sira

Iha prosesu julgamentu, arguidu deklarara faktu sira iha akuzasaun ne'e loos hotu, di'ak malu ona ho ofendida, arrepende ninia hahalok, durante forma familia iha tinan 2020, foin primeiravés baku ofendida.

Alende ne'e, ofendida konfirma faktu hotu iha akuzasaun, motivu hosi akontesimentu tanba arguidu bandu ofendida labele uza whatsapp maibé ofendida serbisu nu'udar funsionáriu públiku funsaun admnistrasaun iha Ministériu Saúde Vikeke. Depoisde akontese sira di'ak malu ona no to'o agora arguidu la baku ona ofendida.

Alegasaun finál

Prokuradór haktuir katak faktu iha akuzasaun ne'e provadu hotu, ofendida uza whatsapp tanba nu'udar funsionáriu hodi uza ba serbisu no uza ba komunikasaun mezmu sira di'ak malu ona, maibé nafatin husu ba tribunál atu kondena arguidu ho pena prizaun tinan ida suspende ba tinan ida.

Entretantu, defeza haktuir katak iha produsaun ba prova arguidu konfesa, arrepende nia hahalok no foin primeiravés mai hatan iha tribunál, tanba ne'e husu ba tribunál atu fó pena ne'ebé kmaan ba arguidu.

Desizaun

Depoisde avalia faktu hotu, tribunál prova katak arguidu lori ai-kakeu ida baku dala ida lezada nia ain-tuur rezulta moras no bubu.

Bazeia ba faktu provadu sira ne'e no tetu mós ho sirkunstánsia atenuante sira hanesan arguidu konfesa faktu sira, arrepende ninia hahalok, di'ak malu ona ho lezada no foin primeiravés mai hatan iha tribunál, nune'e tribunál konklui prosesu ne'e no kondena arguidu ho pena multa US\$45.00 ne'ebé arguidu sei selu 0.50 sentavus kada loron durante loron 90. Tribunál mós fiksa pena alternativa durante loron 60 prizaun, bainhira arguidu la kumpri pena multa refere.

14. Krime ofensa ba integridade fizika simples ho natureza violénsia doméstika

Nú. Prosesu : 0004/23.BCEVN
Kompozisaun Tribunál : Singulár

Juis : Dra. Maria Solana da Conceição Fernades
Prokuradór : Dr. Julio da Silva Correia
Defeza : Dr. Germano Guterres Ramos
Desizaun : Pena prizaun fulan 2 suspende ba tinan 1

Iha 24 Outubru 2024, Tribunál Judisiál Primeira Instánsia Baukau, prezide julgamentu leitura sentensa ba krime ofensa ba integridade fízika simples ho natureza VD ne'ebé envolve arguidu LXB hasoru nia feen, iha Munisípiu Baukau.

Akuzasaun Prokuradór

Prokuradór akuza katak, iha 02 Jullu 2023, iha oras tuku 19:30 kalan, arguidu tebe dala rua iha ofendida nia kelen parte karuk, arguidu uza raga rounpa nian hodi baku dala ida iha ofendida nia ulun no soe ofendida nia rounpa. Antes ne'e, arguidu ho ofendida diskute malu kona-ba ofendida ba mate uma fila tarde, nune'e mosu agresaun ne'e.

Iha loron no fulan ne'ebé la apura, maibé iha tinan 2020, arguidu baku dala haat iha ofendida nia isin.

Prokuradór akuza arguidu kontra artigu 145 KP kona-ba ofensa ba integridade fízika simples ho nia moldura penál to'o tinan 3 ka multa konjuga ho artigu 2,3, 35(b) no 36 LKVD.

Produsaun ba prova sira

Iha prosesu julgamentu, arguidu deklara katak la tebe no la baku ofendida ho raga, maibé arguidu soe sai raga rounpa nian mak kona ofendida nia ulun tanba ofendida tolok no trata arguidu. Arguidu deklara liután katak depoisde akontesimentu ne'e sira di'ak malu ona.

Iha parte seluk, ofendida kontinua konfirma faktu hotu iha akuzasaun no deklara katak antes ne'e arguidu mós komete krime hasoru ofendida.

Alegasaun finál

Prokuradór haktuir katak arguidu provadu komete krime hosoru ofendida, mezmú arguidu koko atu nega faktu sira iha akuzasaun, maibé lezada konfirma, tanba ne'e husu ba tribunál atu kondena arguidu ho pena prizaun tinan ida suspende ba tinan ida.

Entretantu defeza haktuir katak haree ba produsan ba prova ne'ebé produs iha audiénsia julgamentu, husu ba tribunál atu fó pena ne'ebé adekuadu ba arguidu.

Desizaun

Depoisde avalia faktu hotu, tribunál konsidera faktu hotu iha akuzasaun provadu hotu.

Bazeia ba faktu provadu sira ne'e no tetu mós ho sirkunstánsia hotu ne'ebé haleu krime ne'e, nune'e tribunál konklui prosesu ne'e no kondena arguidu ho pena prizaun fulan rua suspende ba tinan ida.

15. Krime ofensa ba integridade fizika simples ho natureza violénsia doméstika

Nú.Prosesu : 0021/23.VQLLT
Kompozisaun Tribunál : Singulár
Juis : Dra. Albertina da Conceição das Neves
Prokuradór : Dr. Ambrósio Rangel Freitas
Defeza : Dr. Germano Guterres Ramos
Desizaun : Pena multa US\$45.00

Iha 24 Outubru 2024, Tribunál Judisial Primeira Instánsia Baukau Prezide julgamentu leitura sentensa ba krime ofensa ba integridade fizika simples ho natureza VD ne'ebé envolve arguidu RXA hasoru nia feen, iha Munisípiu Vikeke.

Akuzasaun Prokuradór

Prokuradór akuza katak iha 23 Novembru 2023, iha oras tuku 20:00 kalan, arguidu tuku dala ida ho maka'as iha ofendida nia kotuk laran, foti tan ai-sar baku dala rua iha ofendida nia kotuk laran no baku dala ida iha ofendida nia kabaas parte loos, haree ba ofendida tanis maka'as arguidu hodi ai-sar fai ba ofendida niaibun kulit no sama ofendida nia ulun ba rai. Antes agresaun ne'e, arguidu ho ofendida diskute malu kona-ba ofendida obriga arguidu atu ba tuir treinu arte marsiais, nune'e mosu agresaun ne'e.

Prokuradór akuza arguidu kontra artigu 145 KP kona-ba ofensa ba integridade fizika simples ho nia moldura penál tinan 3 ka multa konjuga ho artigu 2,3, 35(b) no 36 LKVD.

Produsaun ba prova sira

Iha Prosesu julgamento, arguidu deklara katak faktu sira iha akuzasaun ne'e loos hotu, depoisde akontese liu loron tolu sira di'ak malu ona no husu ona deskulpa ba ofendida, arrepende ninia hahalok, foin primeiravés mai hatan iha tribunál no arguidu nu'udar agrikultór rezultadu hodi sustenta de'it ba família.

Alende ne'e, lezada continua konfirma faktu hotu iha akuzasaun, depoisde akontese lezada halai ba nia inan no aman nia uma liu loron rua arguidu ba tuir sira rezolve no di'ak malu ona no agora arguidu la baku ona lezada.

Alegasaun finál

Prokuradór haktuir katak, haree ba produsaun ba prova arguidu nia aktu ne'e priense krime ho natureza violénsia doméstika, Mezmu sira di'ak malu ona maibé husu ba tribunál atu kondena arguidu ho pena multa.

Entretantu defeza haktuir katak arguidu konfesa faktu hotu iha akuzasaun, arepende ona nia hahalok, di'ak malu ona ho ofendida, Tanba ne'e husu ba tribunál atu aplika pena ne'ebé kmaan ba arguidu.

Desizaun

Depoisde avalia faktu hotu, tribunál prova katak konsidera faktu hotu iha akuzasaun prokuradór nian provadu hotu.

Bazeia ba faktu provadu sira ne'e no tetu mós ho sirkunstánsia atenuante sira hanesan arguidu konfesa, arrepende ninia hahalok, di'ak malu ona ho lezada no foin primeiravés mai hatan iha tribunál, nune'e tribunál konklui prosesu ne'e no kondena arguidu ho pena multa US\$45.00 ne'ebé arguidu sei selu US\$1.00 kada loron durante loron 45. Tribunál mós fiksa pena alternativa durante loron 30 prizaun, bainhira arguidu la kumpri pena multa refere.

16. Krime ofensa ba integridade fizika simples ho natureza violénsia doméstika

Nú. Prosesu : 0049/22. VQOSU
Kompozisaun Tribunál : Singulár
Juisa : Dra. Maria Solana da Conceição Fernades
Prokuradór : Dr. Ambrósio Rangel Freitas
Defeza : Dr. Germano Guterres Ramos
Desizaun : Pena multa US\$45.00

Iha 29 Outubru 2024, Tribunál Judisiál Primeira Instánsia Baukau prezide julgamentu leitura sentensa ba krime ofensa ba integridade fizika simples ho natureza VD ne'ebé envolve arguidu MRG hasoru nia feen, iha Munisípiu Vikeke.

Akuzasaun Prokuradór

Prokuradór akuza katak iha 06 Novembru 2022, iha oras tuku 19:00 kalan arguidu basa dala ida iha ofendida nia hasan parte karuk, tuku dala barak iha ofendida nia kotuk laran no tebe dala barak iha ofendida nia kelen parte loos no karuk. Antes ne'e, arguidu ho ofendida diskute malu kona-ba ofendida haruka arguidu hein labarik ofendida atu tein maibé arguidu lakohi hein labarik. Iha loron no fulan ne'ebé la apura, maibé iha tinan 2020, arguidu buti ofendida nia kakorok.

Prokuradór akuza arguidu kontra artigu 145 KP kona ba ofensa ba integridade fizika simples ho moldura penál tinan 3 ka multa konjuga ho artigu 2,3, 35(b) no 36 LKVD.

Produsaun ba prova sira

Iha prosesu julgamentu, arguidu konfesa katak faktu hotu iha akuzasaun no depoisde akontesimentu ne'e sira di'ak malu ona, arrepende nia hahalok, foin primeiravés mai hatan iha tribunál no depoisde ne'e la komete ona krime seluk hasoru ofendida.

Alende ne'e, ofendida kontinua konfirma faktu hotu iha akuzasaun no deklar mós katak depoisde akontesimentu ne'e sira di'ak malu ona no agora moris hamutuk nafatin nu'udar feen la'en.

Alegesaun finál

Prokuradór haktuir katak faktu akuzasaun prokuradór prosedente provadu haree ba arguidu nia deklarasaun no ofendida nia konfirmasaun ba akuzasaun, nune'e prokuradór konsidera akuzasaun procurador nian prosedente provadu

no la difikulta tribunál atu hetan verdade. Tanba ne'e husu ba tribunál atu kondena arguidu ho pena prizaun fulan neen suspende ba tinan ida.

Entretantu, defeza husu ba tribunál atu kondena arguidu ho pena ne'ebé kmaan ho konsiderasaun katak arguidu konfesa, arrepende nia hahalok, foin primeiravés mai hatan iha tribunál no depoisde akontesimentu ne'e la komete tan krime seluk hasoru lezada.

Desizaun

Depoisde avalia faktu hotu, tribunál prova katak arguidu basa dala ida iha ofendida nia hasan parte karuk, tuku dala barak iha ofendida nia kotuk laran no tebe dala barak iha ofendida nia kelen parte loos no karuk.

Bazeia ba faktu provadu sira ne'e no tetu mós ho sirkunstánsia atenuante sira hanesan arguidu konfesa, arrepende ninia hahalok, di'ak malu ona ho lezada no foin primeiravés mai hatan iha tribunál, nune'e tribunál konklui prosesu ne'e no kondena arguidu ho pena multa US\$45.00 ne'ebé arguidu sei selu US\$1.00 kada loron durante loron 45. Tribunál mós fiksa pena alternativa durante loron 30 prizaun, bainhira arguidu la kumpri pena multa refere.

Atu hetan informasaun kompleitu, favór kontaktu:

Casimiro dos Santos

Diretór Interinu Ezekutivu JSMP

Diresaun e-mail: casimiro@jsmp.tl

Telefone: (+670) 33238883 | 77257466

Website: <https://jsmp.tl>

info@jsmp.tl